



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Sebastiani Henrici Penzingeri, Consistorialis
Passaviensis, Decani, & Parochi in Trauttmanstorff ad
Laitam Bonus Ordo Triplicis Formatae Concionis Moralis In
Omnia Festa Sanctorum In Amplissima ...**

Penzinger, Sebastian Heinrich

Solisbaci, 1698

Concio Tertia. Textus: Exultavit infans in utero meo. Thema: Ubi Maria est,
est & omnis felicitas.

[urn:nbn:de:hbz:466:1-51763](https://nbn-resolving.org/urn:nbn:de:hbz:466:1-51763)

IN FESTO VISITATIONIS
B. V. MARIÆ,

CONCIO TERTIA,

Ut audita est vox salutationis tuæ in auribus meis, Textus.
exultavit infans in utero meo. Lucæ cap. 1.

Ubi Maria est, ibi omnis est felicitas.

Thema.

Xordiū mei Thematis, orditur doctissim⁹ Idiota in pro- *Exordium.*
logo de contempl. B. V. *Inventa Virgine Maria, inve-*
nitur omne bonum, ipsa namque diligit diligentes se,
imò sibi servientibus servit. Ipsa super benedicto Fi- *Idiota.*

lio suo irato potissimè reconciliat servos, & amatores suos. Tan-
ta quoque est ejus benignitas, quod nulli formidandum est ad
eam accedere, tantaque misericordia, quod ab ea nemo repellitur,
imò donis & charismatibus adificat servos suos, ut superbe-
nedicti Filii sui, & Spiritus Sancti digna fiant habitatio. Ipsa
preces & sacrificia servorum suorum, & maximè quæ sibi exhibentur,
representat in conspectu divine Majestatis. Unde Eccl^s. cap. 24. ait de Maria Virgine Spiritus Sanctus: *Qui me*
invenerit, inveniet vitam, & hauriet salutem à Domino.
Adest Virgo pientissima in domo Zachariæ; Lucæ 1. Et tota ædes
felicatur. Elisabeth repletur Spiritu Sancto, Joannes sanctificatur
in utero, Zacharias prophetans, benedicit Dominum. Adest
Maria ad nuptias in Cana Galileæ, Joan. cap. 2. & ex aqua factò
vino lætantur convivæ, felicitantur Sponsi. Adest Maria in sta-
bulo Bethlehemitico, & felix stabulum, quod erigitur in Regale
Palatium. Adest Maria, & stat sub cruce ad latus Dismæ, & in
(M) 3 agone

- agone latro summè felicitatur, dum cœli dono ditatur, *hodie mecum eris in Paradiso*. Matth. 27. Adest Maria in cœnaculo S. Pentecostes die, & S. Spiritu repleti sunt omnes. Act. cap. 2. Ubi ergo Maria, ibi est summa felicitas. Quàm benè Adam Abbas Perfeniæ, Serm. de part. B. V. in Mariali. *Maria est felix vna, quam qui tenuerit non errabit, felix Maria, quam qui perseveranter amaverit, non peribit. Per Mariam dispensatur gaudium omni creature, genusque humanum antiquam dignitatem recuperat*, scribit S. Gregorius Thaummat. Serm. 2. de Annunc. B. V. *Redempturus genus humanum omne precium contulit Deus in Mariam*, scribit S. Bonaventura, Serm. de Nativ. B. V. *Quàm voluptate, quibus bonis non impletur, qui Matrem suam, sanctissimam memoria promptuarium effecit*; habet S. Johannes Damascenus Orat. de dormit. B. V. *Beatus vir, qui diligit nomen tuum Maria, gratia tua animam ejus confortabit, tanquam aquarum fontibus irrigatum, uberem in eo fructum justitie propagabis*. S. Bonav. Pf. 1. *Cui saltem ita concessum fuerit, sæpe dulci studio cogitare de Virgine Maria, magnum promerenda salutis indicium esse conjecto*, docet S. Anselmus de Excell. Virg. cap. 4. *Maria presentia, gratam Veris temperem exhibebat, & quo favens se verteret, Paradisus erat*, perorat divus Amadeus hom. 7. de laud. B. V. *Finio cum S. Bonav. Qui acquirit gratiam ejus, agnoscetur à civibus Paradisi, & qui habuerit characterem nominis ejus, annotabitur in libro vite*. in Pfalt. B. V. Psalmo 91. *Implorata S. Spiritus gratiâ in materiam Conceptus audire placeat*.

CONCEPTUS I.

- Confirmatio.* Dum Christus Dominus satis efficacem orationem discipulos edoceret, qua omnia impetrare possent, hanc formulam præscripsit Matth. cap. 6. *Sic ergo vos orabitis: Pater noster qui es in cœlis, sanctificetur nomen tuum.* Ut Deum, in hac prece Patrem nominemus, docuit, cur rectè Patrem, & non potius Regem,

Regem, vel Dominum, nominare Deum instituit? causalem infirmitat Tertullianus lib. de Orat. cap. 2. *Appellatio ista, vel pietatis, & potestatis est, item in Patre & Filius invocatur: Ego enim, inquit, & Pater unum sumus, nec Mater quidem præteritur, siquidem in Filio & Patre Mater agnoscitur, de qua constat & Patris, & Filii nomen.* Deum, Patrem nominando, subobscurè, & Matris Mariæ, fit mentio, docuit ergo Christus, ut Deum, non Regem, non Dominationem appellemus, sed Patrem invocemus, ut hoc nomine, & Matris Mariæ mentio, ac præsentia fieret, quâ citius depellatur calamitas, arrideat felicitas, nam ubi aliqualis Mariæ resplendet umbra, sine calcari adventat cœlestis gratia, quia per Mariam, & gratia hominibus est expromptior, & misericordia impensâ celerior.

CONCEPTUS II.

Ob Benjamitarum ingens crimen, timorata conscientia Judæi, in nefarios hos peccatores armati egrediuntur, super Dei offensam, commissam pœnam, & ultionem petaturi, & licet optima fuerit intentio, casus tamen his zelotis evenit infortunatissimus, & exitialis: Etenim à Benjamitis cæsi, ac fugati sunt: *Egressi filii Benjamin de Gabaa, occiderunt de filiis Israel 22. millia virorum.* Judic. cap. 20. Hâc clade perpetrâ non dejiciunt animos, secundo Benjamitas aggrediuntur, sed iterum ruunt, ac succumbunt: Tertiâ tandem vice in conflictu, non solum Benjamitas vicerunt, sed prorsus atterunt. Qua de causa, quod rectè tertiâ vice, & non etiam primò, & secundò conflictu, victores, ac felices exstiterunt? causam indicat sacer textus: *Eo tempore ibi erat Arca fœderis Domini.* Judicium 20. S. Ambrosius Serm. 25. scribit: *Arcam quid nisi sanctam Mariam dixerimus.* Exindè discamus: Quasi umbræ, præsentia Virginis tribuendum sit beneficium; ubi ubi Mariæ umbra exstat, cedit calamitas, arridet omnis felicitas. Expertus est David.

CON-

CONCEPTUS III.

David à facie Absolon rebellis filii fugere cogitur, *constantes viri flebant voce magna.* 2. Regum c. 15. Abulensis quæst. 28. inquit; hunc fletum, & suspiria populi, ad Deum fuisse supplices preces, ut ab imminente periculo, pudore ac confusione, Rex David eriperetur. Verba Abulensis sic sonant: *Lugebant, divinam implorantes propitiationem.* Ast ad tristem luctam, & supplices preces multorum virorum, periculum omnino non cessat, non tollitur timor, & anxietas; David, tristis ac lugens errat in solitudine, & eremo. Tandem placatus Dominus Deus, David in Regnum introducit, hostibus sublatis, pace quietâ donat: desideratis scire quando? dicit Scriptura tempus: *Venit Sacerdos, & universi Levitæ cum eo, portantes Arcam fœderis Dei.* Doctissimus Sanctius ait: *Quo majus illius fortuna præsidium accederet, Arcam secum adduxere.* Dum ergo Arca fœderis advenisset, optimè sensit David, fortuna mortificata reviviscit, negotium Davidis optimum sortitur effectum. Arca fœderis est umbra Mariæ, hæc ubi adest, fortuna floret, felicitas virefcit. Ubi accedit Matris reverentia, temperatur facilius Filii via, nequit numen non gratificare ei, quem Matris umbra probatur protegere: Audiamus Basilium Seleuc. *Cum multa nobis bona, quæ nullius oratio posset assequi, Deipara opera nobis contingunt, eam benemerenti vicem rependimus.*

CONCEPTUS IV.

Jacob supplex ad Dominum, in momento, & adhuc in illo loco constitutus, quod petit obtinuit: *Et benedixit ei in eodem loco.* Genes. 32. Tempus & horam adnectit sacer textus: *Fam enim ascendit aurora.* Ad auroram ingredientem, & præsentem, felicitatur Jacob, largè benedicitur: cur rectè ingrediente, ac præsentè aurorâ? Petrus Damianus Serm. 41. de Assumpt. B. V. per auroram B. Virginem intelligit. *Hæc est aurora, quam sequitur, imò de qua nascitur Sol Justitiæ; solius Soli claritati succumbens.* Aurora referens Mariam, benedictionem accelerat, & felicitatem hominum præmaturat. Illa præsentè copiosior benedictio

dictionis infunditur gratia, Maria est Dei ad misericordiam formos, dura Dæmonum pernicies, felix hominibus astrum, fortunatum auspiciam, salutis myrothecium, calamitatis exilium, vitæque ditissimum promptuarium.

CONCEPTUS V.

S. Lucas cap. 10. narrat, cum viator in grassatorum manus incidisset, plagisque oppletus, ultimos ageret spiritus; Samaritanus illuc iter agens, misericordia motus, non sine vini morsu vulnera medicatus est. *Samaritanus iter faciens venit secus eum, & videns eum, misericordiâ motus est, & appropians alligavit vulnera ejus, infundens oleum, & vinum.* Salus reddita est ægro, non tamen statim, sed postquam in stabulum introductus, & salubribus vinculis illigatus est. Transi modò ad Actorum caput 3. Ubi cum claudus nativitate, & ex utero suæ matris, eleemosynam precaretur, à S. Apostolis Petro & Joanne pedes accipit, & quos nequibat natura, gressus reformavit misericordia: *Quidam vir, qui erat claudus ex utero matris suæ, bajulabatur, quem ponebant quotidie ad portam templi, quæ dicitur speciosa.* Ad portam speciosam adeò celeriter impetravit beneficium, ut antequam cogitatione præsumeret, non solum insuetam viam mensus fuerit firmis gressibus, sed expeditis saltibus: *Apprehensa manu ejus dextera, allevavit eum, & protinus consolidatæ sunt bases ejus, & planta, & exiliens stetit, & ambulavit.* Jam sese difficultas offert; si Samaritanus ille, ut placet divo Thomæ in Catena, Christum referebat: ait enim: *Samaritanus Christus est.* Cur salutem saucio non statim restituit, nec sine vini austeritate donavit? claudus econtra salutem ad verbum unicum, unico solum Petri nutu obtinuit, & invenit? Advertite textum recitare, claudum hunc ad portam templi speciosam confestim: *Quem ponebant quotidie ad portam templi, quæ dicitur speciosa:* Richardus à S. Laurentio lib. 10. de laud. Mariæ, per portam templi speciosam, MARIAM intelligit: *Ipsa designatur per portam templi, quæ dicitur speciosa, Act. 3. ad quam debemus*

Pars II.

(N)

mus

mus sedere, & mendicare exemplo illius claudi, quem sanavit ibi Petrus dicens ei: In nomine JESU Nazareni surge, & ambula. Ubi ubi Virginis præcessit imago, & præsentia, misericordia claudis & celerior, & salus facilior, at ubi Virginis nulla præcesserat umbra, salus viatori aliquantulum tardior, & medela etiam austerior: ut hinc noscamus, quam citò ad Deiparæ præsentiam nostra calamitas depellatur, & absque doloris censu si-
lus reparetur: Ubi præsens est tanta umbra Mariæ, ibi misericordia & profusior, & celerior.

Epilogus.

Studeamus ergò Mariam Virginem semper nobis habere præsentem, hanc gratiosissimam Matrem intimè colendo, & venerando: Præsens Maria, nos felicitabit, si à cordibus nostris, honor ac cultus Marianus nunquam exulabit. Audiatur Thomas à Kempis Serm. 21. ad Novitios, part. 3. *Si consulari in omni tribulatione queritis, accedite ad Mariam Matrem JESU, & omnia gravamina nostra, aut citò recedent, vel leviora fient; Eligite hanc benignissimam Matrem JESU præ cunctis parentibus, & amicis vestris, in Matrem specialem, & Advocatam ante mortem, & salutate eam salutatione Angelica frequenter, quia hanc Vocem audit valdè libenter; Maria libenter pro vobis orabit pro sua clementia, & JESUS Matrem suam libenter audiet, pro sua reverentia.*

Amen.

